



ӘКІМДЕР САЙЛАУЫНАН НЕ КҮТУГЕ БОЛАДЫ?

Шілде айында елімізде ауыл әкімдерінің сайлауы басталады. Бұл саяси науқанның бұрынғыдан басты ерекшелігі – халық тікелей дауыс беру арқылы өздері қалаған үміткерін таңдап алады. Алайда ауыл халқы әкім сайлауына дайын ба? Трайбализм, жерлестік өршіп кетпей ме?

Елімізде әкімдердің алғашқы сайлауы сынақ ретінде 1999 жылы ұйымдастырылды. Содан бері ауыл әкімдерінің сайлауы аудан басшысының ұсынуымен мәслихат депутаттарының дауыс беруі арқылы жанама түрде өткізіліп келді. Дегенмен соның өзінде тосынсыялар болып тұрды: әр жылдары сайлауларда бірқатар өңірде аудан басшылары ұсынған үміткерлер мен бұрынғы іс басындағы әкімдер емес, басқа адамдар сайланып кеткен кездер кездесіп жататын. Ал қазіргі тікелей сайлау барысында мұндай

күтпеген жағдайдың көп болатыны тіпті де күмәнсіз. Дегенмен заңда ауыл әкімдерін сайлаумен бірге, оларды орнынан алып тастау механизмі де жазылған, сондықтан «кездейсоқ» сайланып кеткен ондай жайсыз қызметкерлерден құтылудың амалдары да дайын.

ХАЛЫҚТЫҢ БЕЛСЕНДІЛІГІ АРТАДЫ

Ауыл әкімдері сайлауының маңызы сол – қазірге дейін тәуелсіз Қазақстанда тек Президент сайлауы тікелей дауыс беру

жүйесі арқылы жүргізіліп келді. Аткарушы биліктің басқа тармақтарының бәрінің басшылары не жоғарыдан тағайындалады, не солардың келісімі арқылы бекітіледі. Мемлекет басшысы Қасым-Жомарт Тоқаевтың басшылығымен жүргізілген саяси реформаның негізінде енді аудандық маңыздағы қалалардың, кенттердің, ауылдардың, ауылдық округтердің әкімдерін сайлау тікелей дауыс беру арқылы өткізілетін болды.

(Жалғасы 6-бетте)

Бисен ЖАҚЫПОВ:

Қазіргі сарбаздар – смартфонмен өскен балалар



Қоғамда әскердегі әлімжеттік әлде де сақталғаны жайлы пікірлер жиі айтылады. Оған кейде армия қатарында жүргенде өз-өзіне қол салатындардың кездесіп қалатыны отқа май құйғандай әсер ететіні бар. Ал офицерлер әлімжеттік азайғанын алға тартады. Алайда әскерде суицид мен әлімжеттік көріністері қандай деңгейде? Әскердегі тәртіп қалай бақыланады?

5 >>

Қуаңшылық шаруаға тұсау болды

Еліміздің батысы мен оңтүстік облыстарындағы ауыл шаруашылығын тұралатқан қуаңшылық Ақмоланы да айналып өтпеді. Жауын-шашынның аздығы мен ауыл шаруашылығы дәнді-дақылдары мен шабындықтардың қазіргі жағдайы алаңдатарлық. Әсіресе, соңғы апталарда болған қатты ыстық пен өрт оқиғаларының жиілеуі мал жайылымы мен шабындық жерлерді тақырлап кеткен. Мұнымен қоса жер емген диқандардың да еткен еңбектерін еш кетіруі бек мүмкін.



6 >>

Жас отбасыларды баспаналы еткен жобалар



Ел егемендігінің 30 жылдық бедерінде жастарға аз көңіл бөлінген жоқ. Әсіресе, жас отбасыларды баспанамен қамту бағытында баянды бағдарламалар жанданып, жүйелі жобаларға жан бітті. Әрине, тәуелсіздіктің алғашқы 10 жылдығында тұрғын үй құрылысы баяу жүргізілгенімен, кейінгі 20 жылдықта ерекше қарқын алды. Жас отбасыларды баспана бақытына кенелткен бағдарламалардың алғашқысы – «Жас отбасыларға арналған тұрғын үй» жобасы.

4 >>

ӨРІСІҢДІ ӨРТ ШАЛСА...

Жұттың бірі – өрт. Биыл Қазақстанда аптап ыстықтан қуаңшылықпен қатар, дала өрті де ерекше күшейіп кетті. Бірнеше өңірде шаруалар жайылым, шабындық жерлерінен айырыла бастады. Әсіресе, ел Үкіметінің иек астындағы Арқа төсінде орналасқан Қарағанды, Қостанай облыстары тілсіз жаудың зардабын қатты тартып жатыр. Соның өзі-ақ жемшөп пен ет бағасын шарықтата түсері сөзсіз.

ТОРҒАЙ ДАЛАСЫНДА ТҰТАНЫП...

Маусымның соңына қарай Қостанай облысының Аманкелді ауданы аумағында найзағай салдарынан 600 гектардан астам жерді жалын шарпыды. Одан кейін бір емес, 8 жерден жай түсіп, көрші Жангелді ауданындағы «Алтын Дала» резерватының аумағынан қою түгін бүрк ете қалды. Он шақты күнге ұласқан алапат өртке ауыл тұрғындары мен жергілікті бірлі-екілі өрт сөндірушілер ескі техника, жалаң қолмен ие бола алмай қалды. Онсыз да биыл қырда шөп шығымсыз болып, мал жайылатын жер тарылып бара жатыр еді, төбеден жай түскен мына жайт қыстың қамын күйттей алмай жатқан жұртты одан сайын есенгертпей тастады. Биліктен көмек күтіп шаршаған Екідін, Жанақала, Көлқамыс ауылдарының тұрғындары қызыл жалынға тракторға тіркелген бөшкемен су құйып, аяқтарының астын киіз байланған құрықпен сабалап әлектенді.

«Арқалықтан бір автобус адам келді көмекке. Бірақ қолдарында құралдары жоқ, жалаң қолмен не істей алады? Күннің ыстығы мен самал жел жағдайды ұшықтырып барады» деп ашыңды сонда Жанақала ауылының тұрғыны. Оның айтуынша, қала әкімдігі жіберген ескі өрт сөндіру көлігі жолда өзеннен су алып жатқанда батпаққа батып, бұзылып тынған. Ал, Арқалық қаласы төтенше жағдай бөлімінің аға инженері, азаматтық қорғау лейтенанты Данияр Рүстемов ауылға өрт сөндіру қызметі шыққанмен, шалғайда байланыстың жоқтығынан олардан хабар ала алмағанын жасырмады. Сол кезде Жангелді ауданының Аралбай ауылы аумағында өрт эп-сәтте 40 гектар аумаққа жайылып, Аманкелді ауданының Қабырға ауылдық округінде де



тілсіз жау халыққа түн ауғанша бой бермей жатқан-ды.

Оқиғадан сырттай хабар алып отырған Арқалық қаласының бұрынғы әкімі Жомарт Түбекбаев: «Маңғыстау, Қызылордада шөп, су жоқтықтан мал қырылуда. Бір айdan бері Торғай жақта дала өрті күшейіп, жайылым мен шабындықтар жанып, техника жоқтықтан халық жалаңаш қолмен сөндіре алмай, қиналып жатыр. Мұндай апатты жағдайда Үкімет басшысы апат орнына барып, жедел шешім, шұғыл шара қабылдау керек қой. Апат орнына Үкімет басшысы түгіл, облыс әкімі де бармаған. Не ойлары бар екен?» деп астанадан үн қатты. Ал оған Арқалық қаласының әкімдігі әлеуметтік желі арқылы өз уәжін айтып ақталды. Айтуынша, қалалық өрт сөндіру бөлімінен әр ауылға бір-екі техника мен ондаған маман жіберілген. «Екідін, Жанақала ауылдары аймағындағы дала өрті кезінде Арқалық қаласы әкімінің орынбасары Ерлан Раисов, қалалық ТЖ бөлімінің бастығы, азаматтық қорғау капитаны Асылхан Нұрғалиев өрттің басында болып, ұйым-

дастыру жұмыстарын жүргізді. Өрттің сөндірілу барысы қала әкімі Әмірхан Асановтың жіті қадағалауында болды», – дейді одан әрі. Алайда Қостанай облысынан қосымша күш жұмылдырылмауы салдарынан, шала бықсып барып, қайта тұтанған ол өрт Екідін ауылының Жайлауқөл, Жыланды, Қыналы, Сатый, Сарбас, тағы басқа жайлаулары мен қыстақтарының жайылым, шабындық жерлерін түгел отқа ораған қалпы, ақыры Қарағанды облысының көршілес Ұлытау ауданына өрлеп кете барды. Оны Қостанай облысының әкімі Архимед Мұхамбетовке қарағанда пысықтықтанытып, Ұлытау ауданына тікұшақпен бара қойған Қарағанды облысының әкімі Жәніс Қасымбек өз аузымен айтты. «Ұлытаудың Шенбер, Қорғасын ауылдары арқылы Қостанай облысынан келген өрт» деп. Ал Арқалық қаласының әкімдігі жалынмен арпалысып жүрген жергілікті тұрғындардың көзін бақырайтып қойып, «өртті ауыздықтадық» деуден танатын емес.

(Жалғасы 3-бетте)

Директордың «тағдырын» кім шешеді?

«Бармақ басты, көз қыстыға» баратын мектеп директорларының жолын кесу үшін жаңа ереже әзірленіп жатыр. Ендігі жерде педагогтерді директордың өзі емес, іріктеу комиссиясы қабылдайды. Жалақылары өскен сайын ауыл мұғалімдерінің «орны» қымбаттай бастады деген пікірлер де бар. Сондықтан жаңа ереже мектептегі жемқорлыққа тұсау сала ала ма?



Жасыратыны жоқ, соңғы жылдары білім бесігіне теңейтін мектеп төңірегінде түрлі қанқу сөздер жиі сөз болады. Білікті кадрларды іріктеп алу тиіс мектеп директорларының креслосы да мыңдаған долларға бағаланатыны туралы алып-қашпа әңгімелер бар.

Жақында ғана «Дана» мектебінің бас директоры Рената Төлегенова әлеуметтік желідегі парақшасында директорлық 15 мыңнан 25 мың долларға дейін бағаланатынын, ал қарапайым мұғалім болу үшін 700 мыңнан 1,5 млн теңгеге

дейін қаражат қажет болатынын айтып жазба қалдырған. Айтуынша, бастауыш сынып мұғалімі лауазымына жұмысқа орналасу үшін 200-300 мың теңге сұрайды.

6 >>

Шаруалардың маңдайы тасқа тиді

Шаруалар жерлерінен айырылып жатыр. Олардың пайларын ірі компаниялар несие алу үшін кепілдікке қоюға құқылы. Ал қарызынан құтыла алмаған кәсіпкерлердің кепілдігін банк не басқа қаржы компаниясы оңай-ақ сатып жібере алады. Жерінен айырылғанын естіп сотқа жүгінген ауылдықтардың маңдайы тасқа тиюде. Өйткені сот олардың талап-арызын қанағаттандырмайды. Оған жалпы жиналыста қабылданған шешім себеп. Мұндай жиналысқа барлық пай иелерінің атынан бір-ақ адам қатысып, келісім бере алады. Қағазға қол қойылғаннан кейін «қазаншының өз еркі, қайдан құлақ шығарса».

7 >>



Жамбылда көпбалалы әкелер заңсыз жәрдемақы алып келген

Мұндай қулықты Сыйбайлас жемқорлыққа қарсы іс-қимыл агенттігінің өңір бойынша департаменті әшкере қылды.

Департамент мамандарының айтуынша, көпбалалы әкелер мемлекетке 14 миллион теңге залал келтіріп отыр екен.

Жалпы, тарқатып айтсақ, ҚР Азаматтық кодексінің 16-бабына сәйкес, он төрт жасқа толмаған балалардың заңды өкілдерінің тұратын жері олардың тұрғылықты

жері болып танылады. Ерлі-зайыптылар арасында неке бұзылған жағдайда ата-ананың біреуімен балалардың бірге тұруы сот шешімімен расталады. Алайда бірнеше әке өтінішінде балалары сонымен бірге тұрады деп көрсеткенімен, сот шешімімен олардың шешісімен тұратыны белгілі болған.

Сол себепті «Азаматтарға арналған үкімет» порталынан көпбалалы отбасыларға берілетін жәрдемақының ата-аналар арасынан тек әкесі тарапынан өтініш біл-

діргендер туралы ақпарат сұратылып, ол тізімдер бойынша қалалық сот шешімдерімен сәйкестендірілген.

Нәтижесінде, 27 көпбалалы әке (бас тартуға шешім шығарылған) 14 337 143 теңгені заңсыз алғаны анықталған. Қазір артық төленген сомдан 150 000 мың теңге республикалық бюджетке қайтарылса, қалғандарымен тиісті жұмыстар жүргізіліп жатыр.

С.САТЫЛҒАН



Үш адамнан сібір жарасы анықталды

Қостанай облысы Денисов ауданы Приречный ауылындағы шаруа қожалығында жиырма шақты ірі қара қырылды. Мамандар сараптама жасап, малдың сібір жарасынан өлгенін анықтады. Жекенің малынан басқа елді мекендерде ауру байқалған жоқ.



Бірақ осы ауылдың үш тұрғыны сібір жарасына шалдыққан.

Облыстық Санитариялық-эпидемиологиялық бақылау департаментінің бөлім басшысы Людмила Налобина: «Бұл адамдар Приречный ауылындағы ЖШС-да жұмыс істеген. Олар малды баққанда немесе сойғанда ауру жұқтыруы мүмкін», — дейді.

Ветеринария басқармасы басшысының орынбасары Бауыржан Бекет: «Болжам бойынша, жыртқыш ан-құс, кеміргіштер сібір жарасын басқа жақтан әкелуі әбден мүмкін», — деп отыр.

Вакцина салдырудан бас тартса, жұмыстан шығарыла ма?

Еңбек және халықты әлеуметтік қорғау министрі Серік Шөпкеновтің айтуынша, «Халық денсаулығы және денсаулық сақтау жүйесі туралы» кодекстің 77-бабына сәйкес, кез келген медициналық рәсім, оның ішінде вакцина да екпе алушының келісімі арқылы ғана жүргізіледі. Вакцинадан бас тартқаны үшін өкімшілік немесе қылмыстық жауапкершілік заңнамада көзделмеген.



Алайда Денсаулық туралы кодекстің 104-бабы 1-тармағына

сәйкес, Қазақстан аумағында жаппай ауру таралу қаупі төнген жағдайда елдің бас санитар дәрігері

шектеу енгізеді. Оның ішінде, кәсіпкерлік және өзге де қызметке карантин енгізеді.

Қаржы пирамидасын құрғандар құрықталды

ҚК-тің 217-бабы 3-бөлімі 2-тармағына сәйкес сотталды тергеу тізілімінде тіркелген қаржы пирамидасын құру және басқару бойынша АСТЕХ.КЗ ЖШС, АСD technology ЖШС, MUDARAVAN CAPITAL ЖШС және MUSHARAKAN CAPITAL ЖШС қызметкерлеріне қатысты қылмыстық іс басталған. Осыған байланысты тергеу шеңберінде Алматы қаласының полициясы АСD Technology негізін қалаушы, 1971 жылы туған М. есімді азамат ұсталғанын хабарлады.

Бұған дейін басты ұйымдастырушы К. есімді азамат ұсталып, қамауға алынғаны айтылған еді. Кейінірек тағы екі күдікті — Р. есімді әйел мен М. есімді ер адам уақытша ұстау изоляторына қамалды. Қылмыстық істі тергеуді Алматы қаласы ПД Тергеу басқармасының тергеушілері жүргізіп жатыр. Жоғарыда аталған ЖШС жұмысшыларының қылмыстық әрекеттерінен зардап шеккендер болса, хабарласуларына болады, — деді Алматы қалалық Полиция департаменті бастығының орынбасары Рүстем Әбдрахманов.



Ресей Қазақстанға 136 миллиард теңге өтемақы төледі




Қазақстанға тиесілі ядролық оқтұмсықтан тәркіленген уран бөлігі үшін Ресей 130 миллиард теңгеден астам (шамамен 305 миллион доллар) өтемақы төледі. Бұл туралы Ұлттық қауіпсіздік комитетінің төрағасы Кәрім Мәсімов мәлімдеді.

«Қазақстандағы құзырлы органдардың алдында ядролық қарусыздандыру бағдарламасы аясында оқтұмсықтардан ресейлік тарап тәркілеген казакстандық уран үлесі үшін ақшалай өтемақы алу туралы өзекті мәселе тұрды. Нәтижесі — бюджетке 136,1 миллиард теңге көлемінде қаражат түсті», — деді Мәсімов.

Оның айтуынша, ортаазиялық республикалардың біріндегі арнайы қызмет барысында Қазақстан ҰҚК ядролық материалдардың заңсыз айналымымен айналысқан трансұлттық қылмыстық топтың жолын кесті. Ол қылмыстық топтың құрамында Орталық Азия елдерінің азаматтары болған.

Әскери қызметшілердің 90%-ы вакцина алды

Қарулы күштерде коронавирусқа қарсы вакцина алғандардың саны 100%-ға жуықтады. Бұл туралы Қорғаныс министрлігінің баспасөз қызметі хабарлады.



Аппараттық кеңесте бас әскери-медициналық басқарма бастығы жеке құрамның шамамен 90%-ы, ал әскери қызметшілер мен азаматтық қызметкерлердің 98%-дан астамы вакцина алғанын баяндады.

«Қарулы Күштер бас дәрігерінің апараты бойынша, COVID-19 жұқтыру ішінара сипатта өтіп жатыр, аурудың ауыр түрде өту жағдайлары болған жоқ. Таяу уақытта қалған жеке құрамда медициналық қарсы көрсетілімдер мерзімі өткеннен кейін вакцина

алғандар саны 100%-ға дейін жеткізіледі», — делінген министрлік хабарламасында.

Еске сала кетейік, қазақстандықтарды жаппай вакциналау сәуір айында басталған еді.

Такси жүргізушілерінен ақша алған



Атырауда деструктив діни ағым өкілдерінің ұйымдасқан қылмыстық тобы ұсталды. Бұл туралы Ұлттық қауіпсіздік комитеті хабарлады.

Топ мүшелері ұзақ уақыт бойы Атырау — Орал — Атырау бағытында жүретін такси жүргізушілерін күш қолданамыз деп қорқытып, ақша бопсалаған. Ұйымдасқан қылмыстық топтың белсенді төрт мүшесі ұсталды.

Олардың тұрғылықты жерінен 3 түрлі қару мен оқ-дәрі, сондай-ақ олардың қылмыстық әрекетін растайтын құжат материалдары (чектер, журналдар, банк карточкалары) тәркіленді.

«Осы факт бойынша ҚР ҚК 194-бабының 2-бөлігі (бопсалау) бойынша сотқа дейінгі тергеу басталды. Топ жетекшісі тергеу изоляторына қамалды, қалғандары ешқайда кетпеу туралы міндеттеме алды. Тергеу шаралары жалғасып жатыр», — делінген ҰҚК хабарламасында.

Картоп пен сәбіз арзандай ма?

Сауда және интеграция министрі Бақыт Сұлтанов картоп пен сәбіз бағасына қатысты пікір білдірді.

«Сәбіз бағасына қатысты айтарым, көрші Өзбекстанда осындай проблема болды. Шындығында, бізде импорттың әсерінен сәбіз бағасы қымбатталды. Өйткені көрші Өзбекстан мен Ресейде де сұраныс артты. Қазіргі уақытта картоптың бағасы арзандап жатыр. Күзде баға тағы да төмендейді», — деді Сұлтанов.

Сәбіз тапшылығы барлық өңірде болды. Себебі биыл егіс көлемі азайған.



Дайындаған М.БАҚЫТЖАН

